

Lekelayi kuditatshisha ku bualu bumue; kadi mu malu onso ku ditendelela ne ku disengelela numanyishe Nzambi bua milombo yenu ne disakidila. Ne ditalala dia Nzambi didi ditamba dijingulula dionso dia bantu, nedilame mitshima yenu ne meji enu mu Kilisto Yesu.

(Filipoi 4:6-7)

Kubulula kua meyi ebe kudi kutemeshila bantu munya.

(Musambu 119:130)

Paulo wakafundila Timote ne, Ku buana buebe wewe wakamanya Mukanda wa Nzambi, udi mumanye mua kukuvuija muena meji too ne ku lupandu luakulua bua ditabuja dia mu Kilisto Yesu.

(2 Timote 3:15)

Muntu kikadi biende ne muoyo bualu bua bidia nkayabi, ikale biende nawu bualu bua meyi onso adi alupuka mukana mua Nzambi.

(Matayo 4:4)

Nzubu wa bantu bakane neajalame

(Nsumuinu 12:7)

Mukelenge Yesu wakamba ne: Muntu yonso udi mumvue meyi anyi aa ne utu waatumikila neikale bu muena meji, wakibaka nzubu wende pamutu pa dibue; mvula yakaloka, misulu yakuula, bipupu biakalua, biakakuma ku nzubu, kadi nzubu kakupuka, bua yeye wakadi muibaka pa dibue.

(Matayo 7:24-25)

Kakuena muntu udi mua kujadika bishimikidi bikuabo, anu biobio biakamana kujadikibua, bidi Yesu Kilisto mene.

(1 Kolinto 3:11)

Mu munga muntu yonso kamuena lupandu, bualu bua kakuena dinga dina muinshi mua diulu, dipa bantu, didi dimanye mua kutusungila.

(Bienzedi 4:12)


Buloba budi bujimina ne lukuka luabu kabidi; kadi yeye udi wenza mudi disua dia Nzambi udi ushalaku tshiendelele.

(1Yone 2:17)

© C.E.R.S. - B.P. 1673 Kananga
République Démocratique Du Congo

Email: 33eme.cers.lit@gmail.com

<http://www.33eme-cers.org/>



Nzambi wakajadika diku dia kumpala

Yehowa Nzambi wakamba ne, Kambimpe bua mulume ashale nkayende nansha; nemmufukile mukuatshishi bu mudiye. Yehowa Nzambi wakaladika mulume tulu tukole, ne yeye wakalala tulu; wakangata lubale luende lumue, wakabuikila musunyi kabidi; ne lubale luakangata Yehowa Nzambi kudi mulume, yeye wakenza nalu mukaji, wakalua nende kudi mulume. Bua bualu ebu mulume neashiye tatuende ne mamuende, nealamate mukaji wende; bubidi buabo ne bikale mubidi umue. (Genese 2:18,21-22,24)

(Nzambi kakapesha Adama mukaji wende, Eve, bu mupika wende, anyi bu muena mudimu wende, kadi bua bobo banangangane ne bakuatshishangane.)

Nzambi wakela mikenji bualu bua dilongolola dimpe dia mu diku

Nuenu balume ... nuikale ne bakaji benu bu mudi lungenyi luimpe, bu mudibo banutambe mubidi butekete. Lekelayi kuikala ne mitshima ya luonji kudibo. Balume, suayi bakaji benu bu muakasua Kilisto ekeleziya kabidi, wakadifila bua bualu buende. (1 Petelo 3:7. Kolosai 3:19. Efeso 5:25)

Bakaji, nukokele babayenu; nunku bikala bakuabo kabayi bitabuja diyi dia Nzambi, ne bapetebue mu bualu bua Nzambi kabayi ne diyi dia Nzambi, ku bienzedi bia bakaji babo: patangilabo bienzedi bienyu bilengele bidi ne ditshina. (1 Petelo 3:1-2)

Yisha muana mu njila udiye ne bua kuendela; nunku pakoleye, kena umukamu. Muana udibo balekela nkayende udi ufuishisha mamuende bundu. (Nsumuinu 22:6. 29:15)

Ku mesu kua Nzambi, dibaka didi bua matuku onso adi bena dibaka ne muoyo

Dibaka dikale dinemekibua munkatshi mua bantu bonso. (Ebelu 13:4)

Bualu ebu budi disua dia Nzambi, tshijila tshienyu mene, bua nuenu nudikande ku masandi; muntu ne muntu wa munkatshi muenu amanye mua kukubeye mubidi wende mu tshijila ne mu kunemeka. (1 Tesalonike 4:3-4)

Mukelenge Yesu wakamba ne, Ku tshibangidilu Mufuki wakabafuka mulume ne mukaji, Mufuki wakamba biende ne, Bua bualu ebu mulume neashiye tatu wende ne baba wende, nealamate kudi mukaji wende; bubidi buabo ne balue mubidi umue. Nunku, kabena bantu babidi kabidi, badi mubidi umue. Bua bualu ebu muntu kapanduludi tshidi tshibumbakanya kudi Nzambi. (Matayo 19:4-6)

Kanubuelakanyi ne tshidi tshibi

Nzambi wakamba ne, Muntu yonso udi ubuelakana ne bena mupongo ne batempi ba mbuku bua kulonda malu abo a masandi, nengumushe mesu anyi kudi muntu awu, nemmumushe munkatshi mua bana babo.

(Lewitiki 20:6)

Muntu kikadi munkatshi muenu udi utambisha muanende ... mu kapia, nansha mutempi wa mbuku, nansha muena dijimbu, nansha muena bilengu-lengu, nansha muena buloji, nansha musesuishi wa bantu ne milowu yende, nansha mutendeledi wa bakishi, nansha muena mupongo, nansha muena lubuku lua muzangu. Muntu yonso utu wenza malu awu udi bu tshintu tshibi ku mesu kua Yehowa ... Yehowa, Nzambi wenu, kena witabuja bua nuenu nuenze nunku. (Dutelonome 18:10-14)

Nunku umukayi munkatshi muabo, nuikale batapuluke, bu mudi Mukelenge wamba: Kanulengi tshintu tshibipa, ne meme nennuitabuje. Bikala Nzambi netu, nganyi udi mumanye mua kutupumbisha? (2 Kolinto 6:17. Lomo 8:31)

Mukelenge Yesu wakamana kupita Satana bukole

Yone wakafundila bena Kilisto ne, Bana bakese, nudi ba Nzambi, nuakubapita bukole; bualu bua Yeye udi munda muenu udi upita yeye udi wa mu buloba bunene.

Nganyi muntu udi upita malu a pa buloba bukole? Anu yeye udi witabuja ne, Yesu udi Muana wa Nzambi. (1 Yone 4:4. 5:5)

Mukelenge Yesu wakamba ne, Pa buloba nudi ne dikenga; kadi nukoleshe mitshima yenu; nakupita ba pa buloba bukole. (Yone 16:33)

Maluvu adi anyanga meku a bungi

Mvinyo udi museki wa bantu, maluvu makole adi bu muena diyoyo; muntu yonso udi ubikuatshika kena ne meji. (Nsumuinu 20:1)

Udi udila ne, Ndi ne mulawu nganyi? Udi ne kanyinganyinga nganyi? Udi ne matandu nganyi? Udi utontolola nganyi? Udi ne mputa pambidi kayi wenza bualu nganyi? Udi ne mesu makunze-kunzuu nganyi? Mbadi bashikama ku maluvu musangu mule; mbadi baya kuteta maluvu masambakaje ... Kunshikidilu adi asuma bu nyoka, adi asuma bu nyoka wa mbamvu. (Nsumuinu 23:29-32)

Kuikadi munkatshi mua banu ba maluvu, anyi munkatshi mua bena lumpukusu. Bualu bua mukuatshiki wa maluvu ne muena lumpukusu ne babuele mu bupele. (Nsumuinu 23:20-21)

Kanukuatshiki maluvu, mudi dinyanguka dia muoyo munda muawu, kadi nuujibue tente ne Nyuma Muimpe. (Efeso 5:18)

Kutendelela kua Nzambi mu diku

Bidi bimpe bua meme kusemena pabuipi ne Nzambi. Semenayi pabuipi ne Nzambi ne Yeye neasemene pabuipi nenu.

(Musambu 73:28. Yakobo 4:8)